



Era la fin dals emetturs regionalis

Il comité «Na a la fin da las emissiuns» fa attent sin las consequenzas dad in Gea a No-Billag.

2



Duas bilantschas dal 2017

La NZZ ha preschentà 32 umans che han marcà l'onn 2017, tranter auter er Anna Giacometti.

8

südostschweiz

LA QUOTIDIANA

Redacziun: Via Sommerau 32, 7007 Cuirra, tel. 081 255 57 10, redacziun@laquotidiana.ch

Discussiun culla giuventüna da l'Engiadina Bassa

■ (anr/afi) Insembel culs responsabels da la disco «Cult.» ha invidà la Fundaziun mia Engiadina ad üna discussiun publica davart l'avegnir da la giuventüna illa regiun. Duos chi han bandunà lur patria per ramassar experienzas i'l ester sun Jon Erni, l'iniziant da mia Engiadina, e Not Vital, artist e proprietari dal chastè da Tarasp. Els duos han raquintà da lur vita

professionala e da lur return in Engiadina Bassa. A la giuventüna han els dat l'ün o l'oter cussagl per realisar ils agens sömmis. In mincha cas sun tant Erni sco eir Vital pronts da spordscher man per realisar ils intents dals juvenils, quai eir per garantir ad els ün avegnir perdüraivel in Engiadina Bassa.

> PAGINA 7

Transparenza, dialog e solidaritad

Radunonza dils possessurs d'habitaziuns secundaras da Breil e contuorn

DA SUSI ROTHMUND / ANR

■ La radunonza dils commembers dalla Cuminonza d'interess dils possessurs d'habitaziuns secundaras egl intschess da Breil e contuorn (IGZWB) ha decidiu la sonda da midar num ed adattar las statutas e secloma da niev «IGZWB.ch Surselva».

La cuminonza d'interess che dumbra actualmein 505 commembers da Breil, Ilanz/Glion, Lumnezia e Sursaiassa Mundaun vul, tenor il president Ignaz Derungs, crescher vinavon e representar ils interess dils possessurs d'habitaziuns secundaras. Ei mondi oravontut per las quater petgas transparanza, dialog, stema e solidaritad. Igl intent seigi tuttavia buca quel da reclamar e selamentar, mobein era s'engaschar e porscher maun per optimar la situaziun. Avon la radunonza annuala dalla «IGZWB» ha l'Agentura da novitads rumantscha tschentau enqual damonda a Derungs e sin fundament da sias rispostas era schau prender posiziun il president communal da Breil, Clau Schlosser. El presidescha numnadamein la vischnaunca culs pli biars com-



Possessurs d'habitaziuns secundaras da Breil, Ilanz/Glion, Lumnezia e Sursaiassa Mundaun s'uneschan ella «IGZWB.ch Surselva» per contonscher dapli transparanza, els tscherchan il dialog e giavischan dapli solidaritad. FOTO S. ROTHMUND

members ella «IGZWB». In tema che occupa dapi l'introducziun ein las taxas da hospes e da turissem. Damondas sveglian denton era las ta-

xas da rumians e quellas per l'aua. Senza vuler criticar la lavur dalla Surselva Turissem SA giavischa la cuminonza d'interess dapli trans-

parenza da quella, oravontut quei che pertucca las finanzas.

> PAGINA 3

Visiun Porta Alpina – l'ultim chapitel è scrit

■ (rtr) Uss è era l'Uniuon Visiun Porta Alpina istorgia. L'uniuon è vegnida schliada suenter ch'ella è stada prest 10 onns inactiva. Il project saja en sazez stà finì avant 10 onns. La dissoluziun da l'uniuon saja simplamain il stritg final. Quel stritg saja dentant plitost be anc in stritg formal, ha declerà il president Arthur Loretz. Tenor el na saja quai era betg stà in mument emozional: «Jau hai ussa gi diesch onns peda da ma preparar sin quel mument», ha el manegia cun in surrir. Avant diesch onns haja quai dà davart dal manader da project dal chantun per la Porta Alpina sco era davart da la politica il giavisch da betg gist schliar l'uniuon,

quai per avair vinavant in lieu da contact u, sco Loretz di, per avair insatgi che tegna la bandiera. Els ultims diesch onns n'è betg vegni fatg radunanzas. Sin l'invitaziun a la radunanza generala n'haja quai dà nagins resuns. Per ils var 80 commembers che l'uniuon dumbra anc na saja quai nagin tema pli. Cun schliar l'uniuon èsi era stà da decider tge far cun la facultad. Sco Arthur Loretz di sajan quai intgins milli francs. Quels daners sajan vegnids repartids sin trais supstantes che abitan en Sursassiala. Els hajan l'incumbensa da duvrar quists daners per dar pitschens u pli gronds impuls per il svilup regiunal.



Ina da las hallas preparada per la Porta Alpina.

FOTO RTR, G. HOSANG

Concert da la «Hanneli-Musig» a Sent

■ (anr/bcs) D'incuort ha gnü lö il concert da la «Hanneli-Musig» illa baselgia San Lurench a Sent. Els ses musicants han sunà tanter oter eir tocs our dal relasch da Hanny Christen chi ha ramassà a seis temp var 12 000 melodias da musica. Plünavant han els sunà ouvras ramassadas da Men Schmidt da Sent, da Cla Genua, da Peter Davoli da Tavo, da Gia-

comin Morell d'Ardez ed eir bals grischuns. Üna maisdada musicala da gronda qualità sunada da musicants da professiun in möd frais-ch, divertent e da maniera natürala. Il concert es gnü organisa da la Società d'Ütil public chi spordscha dürant tuot on concerts da tuots genres.

> PAGINA 7

Terz grond partenari

■ (anr/gns) Tradiziunalmain ha l'apéro da Bumaun da la Partida liberaldemocratica ils liberals dal Grischun (pld) gi lieu en il chastè dal viticultur Gian-Battista von Tscharnner a La Punt/Rehanau. Giast da la pld grischuna è stada Livia Leu, ella ch'è stada fin ussa delegada dal cussegl federal per contracts commerciaux ed a partir dal 2018 nova ambassadura svizra en Frantscha. Entaifer las naziuns che fan part da la UE saja la Svizra il terz grond partenari da commerzi.

> PAGINA 2

250 cas d'abus sexuals en la baselgia catolica

■ (rtr) Avant set onns ha la Conferenza dals uestgs svizra instradà in post da consultaziun per victimas d'abus sexuals. En quest temp èn vegnidas inoltradas 250 annunzias. Els ultims trais onns èn quai stads en media dus cas per mais. Quai rapportan la «SonntagsZeitung» e «Le Matin Dimanche». Els cas sajan capitads davant dal 1950. Pertutgads sajan passa 140 uffants u juvenils sco er bunamain 90 creschids. 10% dals cas sajan pir capitads l'ultim temp. Per part examineschia la baselgia ils cas mo intern, senza infurmar la giustaia.

Marc ei cuntents e plein veta

Marc Bearth ha mo in narunchel e quel deriva d'in donatur

DA SUSI ROTHMUND / ANR

■ Ils 3 da schaner levon Sandra e Fabian Bearth e lur affons atgnamein festivar il giubileum dad in onn dapi che Marc ha retschiert in narunchel d'in donatur. Mo in di avon ha il buobet da treis onns stuiu vegnir trasportaus el spital regiunal a Glion. En l'emprema ediziun suenter Nadal

ha La Quotidiana rapportau dil pign Marc Bearth da Rabius che pitescha dapi sia naschientscha pervia da cumplaziuns culs narunchels. Dapi in onn viva el ussa cul narunchel d'in donatur e suenter ina odisea en spitals, terapias e bia quitaus va ei ussa dètg pulit. Mo gia ina sempla grippa dil magun e la beglia ha pudiu ruinar la fiasta da giubileum dad

in onn ed enstagl da festivar ha il buobet stuiu passentar quei impurtont di en spital. «All'entschatta savevan nus buca propi tgei ch'ei seigi e cu igl ei stau clar ch'ei seigi 'mo' ina grippa essan nus stai levgiai», ha Sandra Bearth raquintau all'Agentura da novitads rumantscha.

> PAGINA 5



La terapeuta Ingrid Meyer Weber cun Luca e Marc (dretg) che ha fatg immens progress dapi la transplantaziun dil narunchel. FOTO S. ROTHMUND



10002
9771424749004

Servetsch d'abunents e da distribuziun: tel. 0844 226 226
mail: abo@somedia.ch

Il legreivel svilup da Marc

Avon in onn ha Marc Bearth survegni in narunchel dad in donatur

DA SUSI ROTHMUND

■ **Il 3 da schaner avon in onn ei stau in di immens impurtont ella veta da Marc Bearth e sia famiglia. Dapi nov meins fuvà il buobet silla gliesta da spetga per transplantaziuns e quei di ha el finalmein survegni in narunchel d'in donatur.** Oz ha Marc treis onns e viva ina veta quasi dil tuttafatg normala (l'emprema part dalla historia da Marc ei stada da leger en LQ dils 27-12-2017). El ha sulet in narunchel – quel dil donatur – che funcziuna, mo quel fa bein sia lavur. Damai ch'el deriva d'in um giuven ei il narunchel empauet gronds pil buobet che ha aschia in venter in stel pli grond. Sco *Sandra Bearth*, la mamma da Marc, declara ei la grondezia digl organ era il motiv che Marc drova dabia aua. Per far la segira sprezza ella mintga di 1,5 liters aua sur la sonda el pign tgerip. Sur la sonda survegn Marc era ils medicaments per che siu tgerip accepti igl organ jester ed ulteriuras medischinas tenor basegns. Per haver quater onns ei Marc ualti pigns, siu frar Luca che ei dus onns pli giuven ei bunamein tuttina gronds sco el. Ch'el creschi e prospereschi sto uss aunc vegnir controllau regularmein dils medis el spital d'affons a Turig.

Terapia a casa

Suenter la naschienscha bueva Marc aunc latg-mumma. Numerusas dimoras en spital, operaziuns e la necessiad dalla dialisa perquei ch'el narunchels funcziunavan buc han era caschunau problems

da magliar, beiber e laguoter. «Marc aveva ina disfagia. 50 gruppas cun funcziuns muscularas vegnan duvradas per morder e laguoter. Vegnan ellas duvradas nuot ni mo pauc piardan ellas lur funcziun. Dapi treis onns reactivein nus quell», ha *Ingrid Meyer Weber* declarau. Regularmein viseta la logopeda Marc a Rabiun e nus havein astgau esser dalla partida ina dallas davosas gadas. La terapeuta sesa cun Marc e ses frars giun plaun e fa termagls cun els. Marc fa amogna a mi da ses mams, quels ein brav schetgs, mo el laguota els senza problems. A moda ludica ha ella gidau Marc da prender suenter ils deficits da svilup ed adina era integrat la famiglia. La situaziun ei speciala, normalmein van ils pazients numnadamein tier la logopeda en spital e buc il contrari. «Far vegnir Sandra cun Marc a Cuera el spital cantunal fuss stau in brav buordi per la famiglia, quei havein nus vultu evitar e damai che jeu habiteschel a Sagogn e lavurel in di ad jamna el Spital Regional Surselva a Glion havein nus decidiu da visitar il pign a casa», ha Ingrid declarau ed aschuntau ch'ella hagi biaras ga smarvigliu con bein che Sandra e Fabian damognien la situaziun. Ils geniturs da Marc ein leds che la terapia ha giu liug a casa e la logopeda ha integrat tuts treis affons. «Aschia va ei buc adina mo per Marc», ha Sandra declarau e manegiau ch'ei sesprovien adina da far tut il pusseivel per che Jan e Luca vegnien buc alla cuorta ed era buca puppergnai memia fetg perquei che lur frar drovi specialmein bia atenziun.



Ingrid Meyer Weber cun Luca, Jan e Marc (dretg) ch'ei tuts treis plein veta e gaudan las visetas dalla logopeda.

Magliar ei negin problem pli

Avon la transplantaziun dil narunchel ha la logopeda luvrau cun Marc per ch'el prendi tier empauet. El aveva negin sentiment da fom, neginas queidas ed era negin basegns da magliar. El center dalla terapia ei la stimulaziun orala stada. Marc ha empriu da prender enzategi en bucca, da sentir la consistenza ed il gust, da laguoter e la finfinala da magliar e beiber per prender tier peisa. A casa en cucchina han el e ses frars astgau cuschnar cun la logopeda ed han aschia empriu fetg bia a moda ludica. Ei han mirau cudischs da praulas, empriu versets e canzuns. Dalla poppa da maun Tim che accumpogna mintgama Ingrid han ils buobos grond plascher. Cugl agid da Tim ha la dunna – che ha serrau ils treis buobos en siu cor – mussau a Marc dad arver la bucca, da morder e laguoter. La finamira gronda ei stada quella da vegnir naven dalla sonda e da buca pli vegnir nutriu sur quella. Cu nus havein visitau el miez december survegneva Marc aunc 100 ml nutriment per di sur la sonda, dapi la fin digl onn vargau vegn el buca pli nutriu

sur quella. Tuttina resta quei access aunc vinavon per saver garantir igl equiliber d'aua per Marc. Tenor basegns san ses geniturs sprizzar en aua sur il «button». «La finamira ei contonschida, Marc maglia e pren tier, cun buna cunscienza sai jeu terminar la terapia», ha la logopeda puntuau. Damai ch'il buobet ha stuiu ir suenter Daniev en spital pervia d'ina gripa ha el giu infusiuns e sto ussa vegnir tier forzas. La sonda ha el puspei astgau bandunar il spital e turnar a casia.

Legreivel svilup

Priu ora ch'el empau pigns per treis onns ei Marc sesviluppau conform alla vegliadetgna, sa ir sez dapi ch'el ha dus onns e discuoer. Marc ei vivs ed allerts, sco siu frar grond che va igl atun a scola s'interessescha el per la lavur dalla redactura e selegra da schar fotografar per la gasetta. Marc entschiva lu la scoletta, in pass che fa buca directamein quitaus a sia mamma, mo enqual patratg fa ella tuttina. Marc ei violaus encunter la gripa, mo duei era il rest dalla famiglia vegnir violaus e co vegn ei ad esser duront ils

temps da grippas en scoletta? Co vegn ei ad ir cul cateter? Tgi mira ch'el survegni avunda aua? «Nus mein entuorn cun tut quei aschi normal sco mo pusseivel, nus lein buca che Marc vegni stuschaus ora mo perquei ch'el sa buca sponder aua sco ils auters. Per el eis ei normal d'haver in sitget», ha Sandra puntuau. Ils geniturs san ch'ei vegn puspei a dar temps nua che Marc drova in niev narunchel. Per regla tegni in organ d'in donatur 15–16 onns. Ei sperien scapescha ch'ei mondi aschi ditg sco pusseivel, mo en sia veta vegni Marc aunc ad esser dependents pliras ga da donaturs. Quei ei era in dils motivs daco che Sandra e Fabian han buca vultu dar gia l'emprema ga in da lur narunchels. Quels spargnein nus per in'otra ga, mo lu stuein nus aunc schar controllar sch'els ein adattai. Il svilup da Marc ei en mintga cass legreivels ed ei resta mo da giavischar tut bien all'entira famiglia e che biars sedeciden da daventar donaturs ni silmeins discuoerien surlunder cun lur parents.

Ulteriuras informaziuns: www.swisstransplant.ch; www.kkc.ch



Grazia ad in donatur ha Marc Bearth survegni in narunchel e sa ussa viver ina veta relativamein normala.

FOTOS S. ROTHMUND

Giuventetgna da Sumvitg ha interess d'abitar en il vitg

■ (rtr) **Ina grupp da lavur ha elavurà in'idea da far or da la chasa da scola a Sumvitg abitaziuns per giuventetgna. In'idea che ha chattà grond interess tar la giuventetgna da la vischnanca.** Var 80 persunas èn stadas a l'infurmaziun en chasa da scola a Sumvitg, per gronda part glied giuvna. Quai è stà ina surprisa per il supstant *Robert Candinas*. Perquai che la scola da Sumvitg na

vegn betg duvrada pli davent da quest onn da scola saja vegnida l'idea or da la populaziun da far or da la scola abitaziuns u studios, quai che manchia en vischnanca, declera Candinas. Ina idea ch'ina grupp da lavur ha lura persequità vinavant e la finala ha la vischnanca laschè far in architect in studi. Il studi saja ina giada ina proposta per guardar tge che la giuventetgna pensa. Il studi pre-

veda da far quatter abitaziuns en l'auzada sisum. Or da mintga stanza da scola duai quai dar in'abitaziun da 2½ stanzas. Uschia datti duas grondas cun 78 fin 91 m² e duas pitschnas da 48 fin 57 m². L'idea saja che la construziun da las abitaziuns saja bunmartgada per uschia er avair pretschs da locaziun bass, declera Candinas. L'idea da far or da la scola abitaziuns ha la giuventetgna laschè plaschair. I saja probabel la pli prudenta idea tge far cun la chasa da scola che na vegnia betg pli duvrada, hai gi num. Sco quai ch'igl è sa mussà hai era giuvnas e giuven ch'avessan interess da fittar ina da questas abitaziuns. Sco che Candinas ha ditg veglia el uss evaluar ils questuaris che la giuventetgna ha emplenì ora durant la saira d'infurmaziun e lura clamar ensemble la grupp da lavur ed intgins giuvenils per lavurar ora pli detagliadamein l'idea. Sch'i va tenor Candinas duai il project lura vegnir integrà en il budget da l'auter onn uschia che las lavurs pon cumenzar l'entschatta 2019. Sin il pli tard il settember 2019 duessan las abitaziuns lura esser prontas.



Visualisaziun da duas abitaziuns pitschnas.

MAD



Willy Decurtins, Daniel Schneider, Samuel Decurtins, Ursin Decurtins (da seniester). MAD

«Samuel Decurtins ha gudignau emprem turnier da bigliard el bigT

■ (cp) La sonda – ils 6 da schaner 2018 – ha igl emprem turnier da bigliard giu liug el bigT a Dieni. Igl entir di ei vegniudau bigliard, encunter mesanotg ei lu il final denter *Samuel Decurtins* e siu frar *Ursin Decurtins* staus sil plan. Els appartegnan omisus al club da billard Club07 Rabiun cun il president *Willy Decurtins*. Il final – giugaus en ina seria da best of three – ha Samuel Decurtins gudignau

en in final da hitchcock cun 2 ad 1. Suenter il final ha il profi *Daniel Schneider* delectau ils visitaders dil bigT cun ina trick-show. Schneider ei staus pliras gadas campiu svizzer dils umens elita sco era sil podest da campius mundials ed europeics. Il highlight alla fin ei stau in giug amicabel denter il victur digl emprem turnier da bigliard dil bigT Samuel Decurtins e Daniel Schneider.»